

■ CONVIVENZA

Il project «portget»

DA FADRINA HOFMANN*

Il temp da corona na vegn segir betg e restar en memoria a mes uffants sco temp da «lockdown» cun butias serradas e teorias da conspiraziun. Els vegnan a sa regurdar forsa da questa experientscha perquai ch'els n'han betg pudì vesair lur amis ed han gì scola a chasa. Pussibel ch'els san en in pèr onns anc che nossas vacanzas a Cuba han stuì vegnir spustadas. Ed jau speresch ch'els pensian anc gugent a tut las excursions en il gaud, a las aventuras a la riva da l'En ed a las sairas da film cun cornchips e guacamole à la mamma che nus avain fatg ensemen.

Il grond tema da la primavera 2020 era en nossa chasada dentant tut in auter: portgets da mar. Mes uffants vulesan gia ditg portgets da mar. Questas emnas cun dapli quietezza eran idealas per ans deditgar seriusamain a quest giavisch. Jau aveva numnadamain ditg als uffants: «Portgets da mar dat ti pir cura che vus pudais sa occupar sez dad els.» E cun quai manegel jau en emprima lingua: pulir sez il terrari. Ussa hai jau alur conferma nair sin alv e cun suttascripziun. Il project «portgets da mar» ha pudì entschaiver. En l'internet hai jau tshertgà in allevatur en il Grischun ed jau hai chattà ina famiglia che



tira si portgets da mar da muntogna robusts. Perfetg! La famiglia venda be a persunas che sa tegnan vi da las prescripziuns da la protecziun d'animals. Suentar in telefon era la chaussa decidida.

Ils portgets da mar giuven n'eran dentant anc betg naschids, uschia che nus avain gì peda per fasa 2 da noss project: Il studi da cudeschs e la producziun da l'infrastructura. Mes figl è in tip cun in dun artisanal e nus avain en chasa ina pitschna ufficina. Uras a la lunga ha el passentà en tschaler cun resgia e martè. Tenor ils plans dissegnads sez ha el produci chasettas, tunnels e punts – in vair paradì per ils portgets da mar. Mia figlia ha cusì or da t-shirts vegls hamacs per noss novs commembers da famiglia. Gea, portgets da mar aman para da star patgific en il hamac. Atgnamain logic, els derivan oriundamain era da l'America dal sid nua che far la siesta è in punct fix dal program dal di.

In mument da grond plaschair è lura stà cura ch'ils portgets da mar èn naschids. Per WhatsApp èn vegnidas las fotografias da quests chanel da pail. Tge «jöööö» e «ohhh» che quai ha chaschunà! Ils uffants han pudì tscherner lur favurit – tar la figlia ha quai durà secundas, tar il figl uras. La medema procedura cun il num... La fasa 3 era la pli difficila per ils uffants, numnadamain spegtgar sis emnas fin ch'ils gnocs pon bandunar lur mamma. Nus avain passentà quel temp cun ir tar il pur per strom e fain, cun cumprar in giatter per metter en iert e nus avain schizunt fatg ina visita a Seewis per emprender d'enconuscher Polly, Filou e natiralmain era Joy – ina portgetta da mar gia pli veglia che accumpogna ils pitschens sco nanny en Engiadina.

Ed uss èsi uschè lunsch: Ils portgets da mar pon far midada! L'agitaziun è gronda, e quai betg be tar mes uffants, mabain era tar cusrins e cusrinas, amis ed amias, schizunt tar ils vischins. Jau stoss conceder ch'jau ma legrel era sin quests trais animalets stagns ch'han quasi laschè emblidar nus ch'i fiss en sa sez in temp da crisa.

*** Fadrina Hofmann è redactura tar la «Südoschweiz» e viva cun sia famiglia, cun chaun, giat e trais portgets da mar a Scuol.**